





THE BIGGER PICTURE/ALAMY

### (Van vorige bladsy)

groen mannetjie verskyn voor jy stap en onthou om nogtans links en regs te kyk voor jy oorstap en terwyl jy oorstap.

➤ Soms is daar 'n knoppie op die verkeerslig se paal wat jy kan druk. Dié knoppies kom gewoonlik by sebrastrepe voor. Die knoppie veroorsaak 'n groen lig vir voetgangers en 'n rooi lig vir die verkeer. Moet nooit die knoppie moedswillig druk nie!

➤ Oppas vir hoofpaaie – dra helder kleure en wees altyd op die uitkyk vir voertuie.

➤ Moet nooit aanneem dat 'n voertuig vir jou sal stop by 'n sebrastreek nie. Wetlik is voertuie verplig om dit te doen,

maar ons reken liever bang Jan as dooie Jan. Wag tot voertuie stilhou voor jy oorstap – en hou aan links en regs kyk.

➤ As jy op die skouer van 'n hoofpad moet loop omdat daar geen sypaadjie is nie, dra helder kleure en loop aan die regterkant sodat jy die aankomende verkeer kan sien.

➤ Moenie met opset stadig oor 'n voetganger slenter nie. Stap flink en reguit oor.

### Ry veilig bus of taxi

'n Oorvol bus of taxi is baie gevaarlik. Nie alleen maak oorlading dit vir die bestuurder moeilik om beheer oor die voertuig te behou nie,

## >> Kyk links en regs en dan weer links >>

maar as die insittendes haastig moet uitklim, gaan die sakke, tasse en mense wat die paadjies vol staan, dinge net tien maal erger maak. Hier is 'n paar veiligheidsreëls wat jy te alle tye moet toepas wanneer jy van hierdie vervoermiddels gebruik maak:

➤ Wag in 'n tou (weg van die pad af) vir die bus of taxi.

➤ Klim een vir een in.

- Moet nooit by 'n venster uithang of jou arms of bene by 'n deur of venster uitsteek nie.
- Hou die gangetjies in 'n bus skoon. Moenie sakke en tasse daar neersit nie. In 'n noodgeval is dit belangrik dat passasiers hierlangs moet kan beweeg.
- Wag tot die bus stop voor jy opstaan en uitklim.
- Moet nooit naby 'n bus of taxi se agterwiele staan nie.

Dis altyd veiliger om besige strate oor te steek by oorgange vir voetgangers soos hier. Loop liever 'n paar meter verder en gebruik die sebrastreek-oorgang by so 'n kruising. Onthou om te wag dat die groen mannetjie verskyn voor jy oorstap.

Bly uit oorvol busse en taxi's uit; dit is baie gevaarlik. Op die onderste foto is genoeg plek rondom die passasiers en geen tasse versper die gangetjies nie. Onthou om altyd plek te maak vir mense met gestremde en om hulle te help as jy kan.

THE BIGGER PICTURE/ALAMY



THE BIGGER PICTURE/ALAMY



Help altyd gestremdes op openbare vervoer.

### Die bestuurder se verantwoordelikheid

Die bestuurders van voertuie het sekere verantwoordelikhede teenoor die passasiers en ander mense op die pad. Hulle moet:

- Stadiger ry wanneer die paaie nat is. Dit is moeiliker om vinnig te rem op 'n nat pad – in so 'n geval kan 'n voertuig maklik gly.
- Nugter wees. Geen persoon onder die invloed van drank mag agter 'n stuurwiel inklim nie.
- Versigtig en stadiger ry wanneer dit mistig en donker is.
- Hou by die snelheidsgrens in 'n woongebied en altyd op die uitkyk wees vir voetgangers wat die pad oorsteek.
- Versigtig bestuur waar die pad in 'n slegte toestand is.
- Nie die voertuig oorlaai nie.
- Stop by rooi verkeersligte en stop-tekens. Baie ongelukke word deur haastige bestuurders veroorsaak. □

Sorg dat jy altyd betyds by die bushalte is en staan in 'n tou weg van die pad af. Wanneer die bus kom, kan julle een-een inklim – soos hier.




### Is dit padveiligheid of -onveiligheid?

Hoeveel goed kan jy op die prent sien wat onveilig lyk en veiliger gedoen kan word? Kyk of jy minstens vyf dinge kan sien wat verkeerd is – dalk kan jy selfs meer dinge raaksien . . .

### Hier's die antwoorde

1. Die rolskaatsers in die park ry in die middel van die straat oor.
2. 'n Hond wat nie aan 'n leiband vas is nie, val 'n kind aan. So 'n hond kan maklik in die verkeer beland.
3. 'n Fietsryer maak 'n voetganger kwaad en stel sy lewe in gevaar.
4. Van die voetgangers kyk nie links, regs en weer links voor hulle oorstap nie.
5. Talle voetgangers steek die pad oor.



LIFE ORIENTATION FOR THE NEW NATION, GRAAD 4-LEERERSBOEK

## Vir die opvoeders

Lees weer die artikel met die leerders deur. Bespreek nou padveiligheid in die klas.

> 1 Vra die leerders uit oor wat hulle reeds oor padveiligheid weet. Laat hulle oor hul persoonlike ervarings gesels. Laat die leerders nou in groepverband dinkskrums hou oor padtekens en verkeersreëls. Laat hulle die tekens wat hulle ken, op 'n A3-vel papier illustreer. Bespreek nou die veldtog Kom Veilig Daar. Laat die leerders in pare bespreek wat hulle daarvan weet en hoe dit hul padgedrag beïnvloed.

> 2 Stel 'n padveiligheidsplan vir jul skool op. Dit plan gaan as 'n nuwe beleid by jul skool geld. Verdeel die klas in groepe en gee elke groep 'n geleentheid om 'n ander deel van die beleid te skryf. Gebruik die volgende as riglyne:

- Die hele klas: Dink 'n naam, logo en kleur vir jul padveiligheidsbeleid uit.
- Groep 1: Skryf 'n paar verkeersreëls en wenke neer vir voetgangers in en om jul skool. Hou die volgende aspekte in

gedagte: die skoolpatroolie, sebrastrepe of ander belangrike padtekens vir voetgangers in en om jul skool, verkeersligte naby jul skool (as daar is) en voertuie wat gereeld om die skool beweeg. Wat is die leerders se verantwoordelikhede en regte as voetgangers?

- Groep 2: Wie is jul skool se patroolie, het julle 'n patroolie en wat is hul verantwoordelikhede en regte?
- Groep 3: Ry enige leerders met hul fiets skool toe? Wat is hul regte en verantwoordelikhede as fietsryers op ons paaie?
- Groep 4: Sommige opvoeders en ouers ry in hul eie voertuig. Wat is hul regte en verantwoordelikhede as bestuurders van die voertuie in en om die skoolterrein?
- Groep 5: Stel 'n noodplan op. Hierdie plan moet vir leerders wys wat om te doen as iemand by jul skool in 'n ongeluk betrokke is.

Maak nou 'n reuse plakkaat met al hierdie inligting op. Plak dit teen jul gangmuur op vir almal om te lees.

## Het jy geweet?

- > Die wet vereis dat die insittende wie se sitplek met 'n sitplekgordel toegerus is, die gordel wel moet dra.
- > Met 'n motorongeluk het 'n mens gewoonlik net 'n halwe sekonde om te reageer. Kry 'n stophorlosie en kyk hoe vinnig dit is. Dit laat nie veel tyd om te dink en te reageer nie – dra dus altyd jou veiligheidsgordel!

## Vind meer uit

> Opvoeders en leerders kan gerus saam op die volgende webtuiste gaan loer. Daar is baie praktiese wenke oor padveiligheid: [www.safekids.org](http://www.safekids.org)

> Toets jou kennis en kyk hoe goed jy ons verkeersreëls ken: [www.trafficsigns.co.za/](http://www.trafficsigns.co.za/)

> Jy het al sekerlik van die woorde "Arrive Alive" of "Kom Veilig Daar/Aan" gehoor. 'n Mens hoor dit veral op televisie en oor die radio net voor die groot vakansies wanneer daar baie voertuie op die pad is.

Gaan na dié webtuiste vir warm padwenke: [www.arrivealive.co.za](http://www.arrivealive.co.za)

> Ry veilig fiets. Gaan gerus na die Trapkragvereniging se webtuiste by [www.pedalpower.co.za](http://www.pedalpower.co.za)

Of kontak hulle by: Tel.: 021-689-8420

E-pos: [info@pedalpower.org.za](mailto:info@pedalpower.org.za)

Vir skoolprojekhulp 24 uur per dag bestel nou SA se eerste multi-media-ensiklopedie – in Afrikaans – by 021-481-8301 of e-pos: [sales@learningonline.co.za](mailto:sales@learningonline.co.za)

